

ENTRANTE 26 DI JANUARI TA CUMINZA ACEPTA PETICION PA KAVEL

ORANJESTAD(AAN)- Entrante 26 pa 29 di Januari Domeinbeheer ta cuminza acepta peticion pa kavel. Diabierna 22 di Januari lo cuminza cu seyamento di buzon dilanti notaris Tjon Ajon pa 10'or di mainta na Domeinbeheer.

Loting lo bay tuma lugar manera custumber na Tele Aruba dia 2 di Februari 1993 for di 8'or pa 10'or di anochi y si ta necesario otro loting lo tuma lugar na Domeinbeheer.

Lista di e nombenan cu a haya un kavel lo worde publica dia 4, 5 y 6 di Februari den corantnan local. Dia 8 pa 11 di Februari por pasa busca vergunning na Domeinbeheer.

Tur persona mayor di edad (21 aña pariba) por haci un peticion na Minister pa bin na remarca pa haya un kavel pa pone trailer, stellage of auto canto di caminda ariba e ruta di carnaval.

Cada peticion ta costa Afl.4,- segun e "Zegelverordening 1908 art. 34".

Cada persona por haci solamente un peticion. Na momento di haci un peticion e persona mester por identifica su mes solamente cu un cedula, rijbewijs of paspoort.

Cada persona mester acudi personalmente na Domeinbeheer pa haci nan peticion. Esey kiermeen cu bo no por manda un otro persona pa haci un peticion pabo.

Prijs di kavel ta:

1. kavel Afl.75,=
2. kavel Afl.250,=
3. kavel Afls.500,=

Personanan cu ta bin na remarca pa haya kavel(s) (max. 3 kavel(s)), door di e loting na Tele Aruba, tin cu acudi na Domeinbeheer pa scohe nan kavel(s). E scohemento di kavel(s) lo bay segun bo number worde saca for di e tombola na Tele Aruba.

Si den e caso aki e persona cu a bin na remarca pa scohe kavel(s) mes no por bin haci esaki ariba e dia y ora stipula e por mandda un otro persona pa representante.

E persona cu ta bin representa un otro den e caso aki, mester bin cu su propio identificacion y mester por prueba claramente cu e ta encarga pa representa un otro persona mediante un carta firma di e persona cu a bin na remarca pa un kavel y e mesun identificacion cu e persona concerni a bin haci su peticion cu ne. Den total tin 319 kavel(s) disponible.

Pa bin na remarca pa un kavel pa bende cuminda y bebida, un person amster haci un peticion na Minister. E peticion aki lo tin e mesun procedura cu e peticion ariba menciona. E persona cu bin na remarca pa haya un kavel pa bende cuminda y bebida mester pidi un "Buffetvergunning" na Centraal Bureau Juridische en Algemene Zaken. Tin 9 kavel(s) disponibles pa venta di cuminda y bebida.

Den caso cu un persona a haya un kavel y no a haci uzo di esaki un siman promer cu e parada grandi di carnaval, e kavel aki por worde duna na un di e otro personanan cu ta aparece ariba e lista di espera na Domeinbeheer.

E cayanan cu lo ta bin tin kavel disponibel na Vondellaan, L.G. Smith Boulevard y Weststraat. Ariba e otro cayanan di e ruta di carnaval cu no tin kavel, por pone trailer, stellage, auto etc. sin cu mester di paga pa esey, pero semper teniendo cuenta cu e reglanan di trafico y otro condicionnan.

Pa dia Domeinbeheer lo entrega 60 vergunning cual lo worde entrega na e forma aki:

Promer dia

number 1 te cu number 30 parti mainta

number 31 te cu number 60 parti atardi

Segun dia:

number 61 te cu number 90 parti mainta

number 91 te cu number 120 parti atardi etc.

Mescos cu aña pasa DOW lo percura pa tentnan worde instala den e ruta na Vondellaan y L.G. Smith Boulevard pa facilita e personanan cu no tin trailer y ta desea di haci uzo di esakinan. No ta existi ningun clase di reservacion, esun cu yega prome por staciona su mes bao di e tentnan.

Tambe lo tin 7 toilet trailers instala den e ruta di carnaval pa facilita e publico.